



PARLIMEN MALAYSIA

DEWAN RAKYAT

MESYUARAT KEDUA, PENGGAL KELIMA
PARLIMEN KETIGA BELAS
2017

**Jawapan-Jawapan Pertanyaan Jawab
Lisan Harian Yang Tidak Dapat Dijawab
Dalam Dewan Rakyat Daripada
Kementerian**

HARI ISNIN: 7 OGOS 2017

1

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO.10 HINGGA NO. 110)

NOTA: [RUJUK PENYATA RASMI HARIAN (HANSARD)]

**NURELFIRA BINTI MOHD DAUD
SEKSYEN PERUNDANGAN & PROSIDING
PARLIMEN MALAYSIA**

SOALAN NO.: 10

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KELIMA,
PARLIMEN KETIGA BELAS
MAJLIS MESYUARAT DEWAN RAKYAT

PERTANYAAN : LISAN

**DARIPADA : DATO' DR. NIK MAZIAN BIN NIK MOHAMAD [PASIR
PUTEH]**

TARIKH : 7 OGOS 2017 [ISNIN]

SOALAN :

Dato' Dr. Nik Mazian Bin Nik Mohamad [PASIR PUTEH] minta MENTERI PERUSAHAAN PERLADANGAN DAN KOMODITI menyatakan berapa ramaikah bilangan buruh luar yang telah dibawa masuk dan digunakan dalam menjayakan industri perladangan di Malaysia daripada tahun 2011 sehingga 2016 dan setelah Kerajaan melaksanakan transformasi tenaga buruh kepada penggunaan mekanisasi, otomasi dan teknologi berapa ramaikah pengurangan bilangan tenaga buruh daripada luar dapat dikurangkan.

JAWAPAN :

Tuan Yang Di-Pertua,

Untuk makluman Ahli Yang Berhormat, sektor perladangan negara adalah sektor yang berintensifkan buruh terutamanya di peringkat hulu. Berdasarkan statistik yang dikeluarkan oleh Kementerian Dalam Negeri (KDN) dan Jabatan Imigresen, jumlah terkini kemasukan pekerja asing di sektor perladangan dari tahun 2011 sehingga 2016 seramai 268,478 orang. Jumlah ini mencatatkan penurunan sebanyak 30,739 orang atau 10.27 peratus iaitu menurun daripada 299,217 orang pada tahun 2011 kepada 268,478 orang pada tahun 2016. Dari segi keluasan tanaman komoditi bagi tempoh tersebut telah menunjukkan peningkatan sebanyak 12.82 peratus iaitu 6.08 juta hektar pada tahun 2011 kepada 6.86 juta hektar pada tahun 2016. Ini bermakna jumlah pekerja asing berbanding keluasan ladang telah menunjukkan penurunan yang ketara.

Tuan Yang Di-Pertua,

Untuk makluman Ahli Yang Berhormat, pelbagai langkah telah dilaksanakan bagi mengurangkan kebergantungan pekerja asing di sektor perladangan. Antara langkah yang telah dilaksanakan dan diteruskan adalah dengan menggalakkan penggunaan mekanisasi, automasi dan teknologi melalui penyelidikan yang berterusan dalam penjenteraan industri sawit. Ini termasuklah melalui penyediaan peruntukan Dana Mekanisasi Sawit berjumlah RM30 juta yang bertujuan menggalakkan dan membiayai aktiviti

mekanisasi oleh institusi penyelidikan dan tempatan dan antarabangsa. Dana ini dilancarkan pada 17 Januari 2017.

Melalui penyelidikan yang berterusan adalah diharap lebih banyak jentera yang kompetitif dapat direkacipta dan diguna pakai bagi mengurangkan penggunaan tenaga buruh.

Selain langkah-langkah tersebut, Kementerian juga akan terus mengadakan perbincangan dengan pihak industri untuk mengenal pasti langkah-langkah jangka panjang bagi mengurangkan kebergantungan kepada pekerja asing.

Sekian, terima kasih.

6
SOALAN NO: 11

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

PERTANYAAN : LISAN
DARIPADA : YB TAN SRI DATUK SERI PANGLIMA HAJI
ANNUAR BIN MUSA [KETEREH]
TARIKH : 7 OGOS 2017
SOALAN : 11

YB Tan Sri Datuk Seri Panglima Haji Annuar Bin Musa [Ketereh] minta **MENTERI KESIHATAN** menyatakan status terkini pembinaan Pusat Kesihatan Kok Lanas dan adakah projek berkenaan mampu disiapkan dalam tempoh masa yang ditetapkan.

Tuan Yang di-Pertua,

Pelaksanaan projek Klinik Kesihatan Jenis 3 dengan Kuarters Kok Lanas tertangguh disebabkan oleh faktor tapak cadangan projek yang tidak sesuai dan memerlukan kos rawatan tanah yang tinggi. Unit Perancang Ekonomi (UPE), Jabatan Perdana Menteri tidak bersetuju dengan kos rawatan tersebut dan mengesyorkan pihak KKM mengenalpasti tapak baharu bagi projek ini.

KKM telah mengenalpasti tapak baharu bagi projek ini iaitu tapak seluas 4.844 ekar melibatkan gabungan empat lot tanah (Lot 61, Lot 62, PT5860 dan PT5861) bagi tujuan ini. Namun demikian, berdasarkan kepada perbincaran tanah yang diadakan pada 20 Mac 2017, didapati bahawa kos pampasan pengambilan balik tanah adalah terlalu tinggi. Dalam usaha untuk merealisasikan pembinaan Klinik Kesihatan Jenis 3 dengan Kwarters Kok Lanas, KKM telah mengambil inisiatif dengan mengemukakan semula permohonan kepada Unit Perancang Ekonomi (UPE), Jabatan Perdana Menteri agar projek ini dilaksanakan di tapak cadangan asal dan permohonan tersebut telah pun diluluskan.

Lanjutan daripada perkara berkenaan, Jabatan Kerja Raya (JKR) telah dilantik sebagai Agensi Pelaksana bagi projek ini pada bulan Jun 2017. Berdasarkan kepada unjuran awalan, projek ini dijangka akan ditender pada bulan November 2018 dan tarikh milik tapak adalah pada bulan April 2019. Pembinaan projek ini akan mengambil masa selama 24 bulan dan tarikh siap projek dijangka pada bulan April 2021.

SOALAN NO: 12

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL KELIMA,
PARLIMEN KETIGA BELAS,
MAJLIS MESYUARAT DEWAN RAKYAT

PERTANYAAN: LISAN

DARIPADA: YB TUAN CHARLES ANTHONY SANTIAGO

TARIKH: 7 OGOS 2017

SOALAN:

Tuan Charles Anthony Santiago [Klang] minta **MENTERI SUMBER MANUSIA** menyatakan sebab pengisytiharan '*ASEAN Declaration on the Protection and Promotion of the Rights of Migrant Workers*' belum diselesaikan memandangkan proses perundingan telah berlanjutan selama 10 tahun. Apakah isu-isu khusus yang perlu di atasi.

PR-1352-L02182

JAWAPAN:

Tuan Yang Di Pertua,

1. *'ASEAN Declaration on the Protection and Promotion of the Rights of Migrant Workers'* telah ditandatangani oleh Pemimpin-pemimpin ASEAN pada 13 Januari 2007 semasa Sidang Kemuncak ASEAN Ke-12 di Cebu, Republik Filipina. Deklarasi tersebut memberi mandat kepada negara-negara ASEAN untuk mempromosi perlindungan pekerjaan yang adil dan sesuai, pembayaran gaji dan akses yang mencukupi untuk pekerjaan serta tempat tinggal yang teratur untuk pekerja migran.
2. Lanjutan daripada Deklarasi tersebut, *ASEAN Committee on the Implementation of the ASEAN Declaration on the Protection and Promotion of the Rights of Migrant Workers (ACMW)* telah mengadakan sebanyak 17 sesi rundingan bagi memuktamadkan sebuah instrumen. Instrumen tersebut bertujuan untuk mengetengahkan isu pekerja migran dari segi perlindungan dan promosi hak pekerja migran. Kesemua rundingan ini telah diadakan sepanjang tempoh 10 tahun daripada 2007 sehingga kini.
3. Instrumen tersebut mengandungi 10 Bab dan 80 Artikel yang mana kesemuanya telah dipersetujui oleh negara-negara ASEAN. Hanya satu sahaja isu yang masih belum mendapat kata putus atau persetujuan daripada negara-negara ASEAN, iaitu mengenai status legaliti (*status of legal nature*) instrumen berkenaan.

4. Malaysia tetap berpegang kepada keputusan Jemaah Menteri pada 15 Februari 2017 untuk menerima pakai instrumen berkenaan sebagai dokumen yang tidak terikat dari segi undang-undang (*non-legally binding instrument*).

5. Semasa Sidang Kemuncak ASEAN Ke-30 di Manila, Republik Filipina, para pemimpin ASEAN telah memberikan tanggungjawab kepada Menteri-menteri Buruh ASEAN untuk menentukan hala tuju seterusnya dan memastikan bahawa instrumen berkenaan ditandatangani pada Sidang Kemuncak ASEAN Ke-31 di Filipina pada November 2017.

6. Malaysia telah mengulangi pendiriannya melalui *ad-referendum* untuk instrumen ini tidak terikat dari segi undang-undang (*non-legally binding instrument*).

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DR. MANSOR BIN ABDUL RAHMAN [SIK]

TARIKH : 7.8.2017

SOALAN : NO.13

Dr. Mansor Bin Abdul Rahman [Sik] minta MENTERI PENDIDIKAN TINGGI menyatakan apakah langkah-langkah Kementerian dalam meningkatkan penguasaan Bahasa Inggeris para siswazah supaya mereka bertambah daya saing untuk memasuki pasaran pekerjaan terutama siswazah Melayu.

JAWAPAN

Tuan Yang di-Pertua,

Untuk makluman Ahli Yang Berhormat, antara program yang dilaksanakan oleh Kementerian Pendidikan Tinggi (KPT) untuk meningkatkan penguasaan Bahasa Inggeris pelajar adalah melalui penganjuran program kemahiran bahasa Inggeris berdasarkan pencapaian MUET pelajar. Pelaksanaan program ini melibatkan pengajaran formal dan tidak formal di mana pengajaran formal melibatkan empat (4) komponen utama penawaran kursus iaitu *Intensive English*, *General English*, *English For Employability* dan *English for Specific Diciplines*.

Selain daripada itu, pembudayaan Bahasa Inggeris jua turut dilaksanakan untuk menggalakkan penggunaan bahasa Inggeris di dalam sesi tutorial,

pembentangan kertas kerja serta pembentangan kertas projek tahun akhir dan lain-lain sesi pembelajaran tidak formal.

KPT melalui universiti turut melaksanakan beberapa aktiviti program lain bagi meningkatkan penguatkusaan Bahasa Inggeris pelajar antaranya seperti berikut:

- i) Program kerjasama dengan Talent Corp melalui program *English Language Enhancement Project (ELEP)* yang turut menyokong usaha pemantapan penguasaan Bahasa Inggeris di kalangan pelajar;
- ii) Ujian Bahasa Inggeris sebelum bergraduat di mana pelajar di dikehendaki menduduki ujian Bahasa Inggeris sebelum bergraduat untuk mengenalpasti tahap penguasaan Bahasa Inggeris serta menilai kemampuan dalam penguasaan berbahasa pelajar;
- iii) Program *Finishing School* di mana pelajar tahun akhir akan didedahkan dengan kemahiran yang diperlukan untuk ke alam pekerjaan seperti permohonan pekerjaan, temu duga dan penampilan diri; dan
- iv) Kerjasama di antara universiti awam dan *Cambridge Malaysian Educational Development Trust (CEMDT)* bertujuan bagi menyediakan pelajar yang mempunyai penguasaan Bahasa Inggeris yang menyamai standard antarabangsa.

Dalam usaha meningkatkan standard piawaian penguasaan Bahasa Inggeris, KPT turut bekerjasama dengan Kementerian Pendidikan

Malaysia di dalam melaksanakan Pelan Tindakan Bahasa Inggeris 2015-2025. Pelan Tindakan ini menetapkan peranan KPT untuk melaksanakan penjajaran semula kurikulum Bahasa Inggeris, meningkatkan keberkesanan pengajaran dan pembelajaran kursus Bahasa Inggeris serta pentaksiran mengikut *The Common European Framework of Reference for Language* iaitu merupakan instrumen standard antarabangsa untuk mengukur keupayaan berbahasa Inggeris.